

## **Beliebt, respektiert un eschtimiert Erinnerunge an ehemolichi Lehrer**

Es war Mitte de 50cher Johre, wie e jungi Lehrerfamilie uf Bogarosch gewannert is, wu se ihre Lehrerstell angetret han. Anna un Michael Hammes, sie aus Ketfel, er aus Guttenbrunn. Ich war selmols e Kind. Wie ich siewe Jahr alt war un in die erschti Klass ingschrieb gin sin, han mei Eltre gsaat: "Du kumnscht zur Hammes Lehrerin"! Sie war streng, unser Lehrerin, doch gerecht. Wer gelernt hat, der hat gute Note kriet, wer nit.....

Die Hammes Lehrerin war for mich un villi meiner Kumrade Vorbild. Sie hat uns so fors weiteri Lewe vorbereitet, dass mer in jedwelcher Situation "unser Mann" stehn han kenne. Ich han die Hammes Lehrerin eifers in Deitschland besucht, sie hat so intressant verzähle kenne, hat ach Gedichter gschrieb un enzichartich vorgetraa. Es ware unvergessliche Stunde. Doch sie war schwer krank un schaut seit em Jahr (am 02. 02.2022 verstorbt) vun dort owe uf uns, ihre ehemalichi Schiller, un natürlich uf ihre Familie, Freind un Landsleit. Gott gebe ihr die ewige Ruhe!

## **Lehrer un Musikant**

Un dann ware mer in der fünfti Klass, unser Klassenlehrer war Michael Hammes. Er hat Geschichte, Erdkunde un Musich unerricht un natürlich a de Schulchor geleit. Aach er war e strenger un gerechter Lehrer, an de mer uns oft un gheere erinnere.

Sei grosses Hobby war die Musich, er hat Akkordeon wie ke zweiter gspillt un derzu aarich scheen gsung, hat eeni vun de Bogaroscher Musichkapelle ins Lewe geruft, Gassemusich gemacht un zum Baal oder Hochzeit ufgspillt. Ende der 70er Johre, selmols sin schun Bogaroscher aus Deitschland uf Besuch kumm, dann is de Hammes Lehrer geruft gin, als Alleinunterhalter hat er nächtelang gspillt un unser scheeni Volkslieder gsung. Wann es schun gegen Morjet feichtfrehlich weitergang is, hat er es Akkordeon verkehrt rum anghong un die Unerhaltung is weitergang bis alli nimi han kenne.

Jetzt lebt er in Pforzheim, vor korzem hat er sei 90. Geburtstag gefeiert. Mir winsche nachträglich beschi Gesundheit, Zufriedenheit, noch villi scheeni Johre.

## **Als junger Bu in Guttenbrunn**

Grete Weidmann, e Guttenbrunnerin, erinnert sich: "De Hammes Michl. Ja, er is fünf Jahr älter wie ich. Wann ich dran denk, meiner Seel, grad so, wie wann' s erscht gischer gewenn wär. Jetz sin schun mehr als 50 Jahr vergang, seider de Michl selmols unser Hochzeit, wie ich de Niki halt gheirat han, gespielt hat. Mit em Akkordeon un seiner wunderbare Stimm hat er die Hochzeitsgäscht unerhal. Aach wann in Guttenbrunn Baal war un die Musikante Pause gemacht han, is de Michl mit seim Akkordeon uf die Bühne un hat so scheeni Lieder gespielt un gsung. Grad han ich ne vor Aue, wie er die Leit mit em Lied 'Auf einem Seemannsgrab da blühen keine Rosen' so zum Plätsche gebrung hat, dass er Zugabe hat gin misse. Als Jugendlicher war de Michl aach mit de junge Leit aktiv. Er hat mit uns in eem Jahr sogar de Webertanz instudiert. Manches Mol hat er aach mit meim Bruder Desiderius Michelbach, gsung. Scheeni Zeite ware des domols!"